

Bopaki bo Matlafalitsoeng ke Moea



SABATHA THAPAMA

Bakeng sa Boithuto ba Beke Ena Bala:

Johanne 15:26, 27; Liketso 2:41, 42; Liketso 8:4; Baheb. 4:12; Liketso 17:33, 34; Liketso 18:8.

Teman'a Khopolo:

“Eitse hobane ba rapele, ‘nqalo eo ba phuthehetseng ho eona ea sisinyeha, ‘me bohle ba tla Moea o Halalelang, ‘me ba bolela lentsoe la Molimo ka matla” (Liketso 4:31).

Ha Jesu a laela balumeli ba pele a re, “E-eang ka lefatše lohle, le bolelle babopuoahle bohle Evangeli,”” ho tlameha hone ho bonahala e le thomo e sa khoneheng (Mareka 16:15). Ba ne ba ka fihlela qholotso e kholo ha kaalo joang? Lipalo tsa bona li ne li fokola. E ne e le sehlotšoana sa balumeli ba sa rutehang ba bathonyonyana feela tjee. Empa ba ne ba e-na le Molimo o sa tloaelehang o neng o tla ba fa matla bakeng sa thomo ea bona e sa tloaelehang.

Empa Jesu o ile a phatlalatsa, “Empa le tla fuoa matla mohla Moea o Halalelang o tlang ho lona, ‘me le tla ba lipaki tsa ka Jerusalema, le naheng eohle ea Judea, le Samaria, le ho isa pheletsong ea lefatše” (Liketso 1:8). Ho matlafatsoa ke Moea o Halalelang ho ne ho tla ba thusa tseba ho arolelana molaetsa oa sefapano ka matla a fetolang bophelo, a fetolang lefatše. Moea o Halalelang o ne o etsa hore bopaki ba bona bo atlehe. Ka mashome a seng makae a lilemo, evangeli e ile ea ama lefatše lohle. Liketso e phatlalatsa hore balumeli bana ba pele “ba ferekantse lefatše” (Liketso 17:6). Moapostola Pauluse o tlatsa ka hore evangeli e “boleletsoeng babopuoahle bohle ba tlas’a leholimo” (Bakol. 1:23). Thutong ea beke ena, re tla shebana le mosebetsi oa Moea o Halalelang oa ho matlafatsa bopaki ba rona ka Krete.

**Ihute thuto ea beke ena ho lokisetsa Sabatha sa la 1 Phato.*

Jesu le Tšepiso ea Moea o Halalelang

Ka tšepiso ea Moea o Halalelang, Jesu o ile a kokobetsa matsoalo a barutuo ba Hae ka hore oa ba siea o khutlela leholimong. “ho molemo ho lona ha nka ikela; hobane ha ke sa ee, Moemedi a ke ke a tla ho lona; empa ha ke eya, ke tla mo romela ho lona” (Johanne 16:7). Lentsoe le se-Gerike bakeng sa “moemeli” ke parakletos. E bolela ea tlang lehlakoreng la molemong oa ho thusa. O mong oa mesebetsi e ka sehloohong ea Moea o Halalelang ke ho tsamaea lehlakoreng la balumeli bohle ho ba fa matla le ho ba tataisa mesebetsing ea bona ea ho paka. Ha re paka ka Jesu, ha re bang. Moea o Halalelang o lehlakoreng la rona ho re tataisetsa ho ba patlong ka pelo tse tiileng. O lokisa lipelo tsa bona le pele re teana le bona. O tataisa mantsoe a rona, o fana ka kholiseho kelellong ea ea patlong, a be a ba matlafatse hore ba arabele memo ea hae.

Bala Johanne 15:26, 27 le Johanne 16:8. Litemana tsee li re bolella engka mesebetsi oa Moea o Halalelang ho faneng ka bopaki?

Moea o Halalelang o paka ka Jesu. Mokolokotoane oa Hae ke ho tataisetsa batho ba bangata ka moo ho ka khonehang ho Jesu. Thomo ea Hae ke ho tlotlisa Jesu. Mosebetsing ona, o kholisa balumeli bohle ka boikarabello ba bona ba ho paka. O bula mahlo a rona hore re bone menyetla e teng bathong ba re potileng e be o sebetsa lekunutung ho theha kamohelo ea molaetsa oa evangeli.

Evangeli ea Johanne e e beha ka ho hlaka. O “ ‘tla kholisa lefatše hore sebe se teng’ ”(Johanne 16:8). Ka mantsoe a mang, o ama lipelo ho tliša boikutlo bo tebileng ba ho ba hole le Molimo le bohloki ba pako. Hape o kholisa lefatše hore “ho loka ho teng.” Moea o Halalelang ha o senole sebe feela, o boetse o re tataisetsa ho lokeng. O senola bokhabane ba ho loka ha Jesu khahlanong le litšila tsa rona. Mosebetsi oa Moea o Halalelang ha se feela ho supa kamoo re leng babe ka teng; ke ho senola kamoo Jesu a leng molemo, mosa, lereko, le lerato kateng ‘me o re bopa ho ba setšoantšo sa Molimo. Ho paka e mpa e le feela ho sebetsa ‘moho le Moea o Halalelang ho ho tlotlisa Jesu. Ka matla a Moea o Halalelang le katlas’a tataiso ea Hae, re paka ka Krete enoa ea makatsang ea fetotseng maphelo a rona.

Takatsong ea rona ea ho sebeletsa meea, hobaneng ha re lokela ho hopola kamehla hore re sitoa ho sokolla, empa ke Moea o Halalelang feela o sokollang?

Kereke e Matlafetseng

Ka nepo buka ea Liketso e bitsitsoe “Liketso tsa Moea o Halalelang.” Ke tlaho ea liketsahalo tse thahasellisang tsa ho paka, phatlalatsa ea evangeli, le kholo ea kereke. Liketso ke pale ea balumeli ba halalelits'oeng, ba tlatsitsoeng ka Moea o Halalelang, ba amang lefatše bakeng sa Kreste. Ba ne ba itšetlehile ho Moea o Halalelang ka botlalo ho fumana kotulo e mohlolo. Hoo ha bona ke mohlala oa seo Moea o Halalelang a ka se fihlelang ka banna le basali ba inehetseng ho Eena ka botlalo.

Bala Liketso 2:41, 42; Liketso 4:4, 31; Liketso 5:14, 42; Liketso 6:7; Le Liketso 16:5. Ke eng se amang maikutlo a hau ka ho fetisisa ka litemana tsee? Ke molaetsa o fe oo Luka, sengoli ea Liketso, a batlang ho o fetisa ka ho tlaho kholo e potlakileng ha kaalo?

Maikemisetsa a Luka a ho ngola buka ea Liketso ke ho arolela ‘mali ka mong ka bosebeletsi ba Moea o Halalelang kerekeng ea pele. Bona, hape, hore ha a khanane ho sebelisa lipalo ho kala tšebetso ea Moea mongoaha-kholong oa pele. Ke hore, o ne a bala likolobetso. Ho Liketso 2:41, o totobatsa taba ea hore palo ea 3,000 e ile ea kolobetsoa ka letsatsi le leng sebakeng se leng. Ho Liketso 4:3, o bua ka banna ba 5,000 ba ileng ba kolobetsoa. Ho Liketso 5:14, matšoele-tšoele a tla ho Morena ‘me a ea kolobetsoa.

E ka ba ke motho a le mong joalo ka Lidia, molebeli oa Chankana oa Filipi, ngoanana oa mohlanka ea neng a kenoe ke batemona, kapa leqhalaha la Ethiopia, Luka o ela hloko ‘me o tlahela tšebetso ea Moea o Halalelang lipelong tsa batho bana. Ntla ea bohlokoa ke hore kamor’a lipalo tsena tse kholo ke batho ka bo mong ba bona, eo e mong le e mong oa bona e leng ngoan’a Molimo eo Jesu a mo shoetseng. E, re rata lipalo tse kholo, empa qetellong, ho fana ka bopaki ke boikitlaetso ba motho ho motho ka bomong. Ho atlehisa kholo e potlakileng ea kereke ea Testamente e Ncha, ho ile ha hlongoa likereke tse ncha. Le leng la mabaka ao ka oona kereke ea pele e ileng ea hola kapele haholo ke hore kereke e ne e nchafatsoa ka ho lula ho hlongoa likereke tse ncha. Ke molaetsa o bohlokoa ha kaakang bakeng sa rona kajeno.

Maikemisetsa a sehlooho a kereke ea Testamente e Ncha e ne e le bosebeletsi. Re ka etsa joang hore, khubung ea tsohle tseo re li etsang likerekeng tsa rona tsa lehae, bosebeletsi bo lula bo le khubung?

Moea o Halalelang le Bopaki

Hohle kahare ho buka ea Liketso, Moea o Halalelang o ne a le teng ka matla a maholo. O sebelelitse le ho sebetsa ka balumeli ha ba ntse ba paka ka Morena oa bona ka litsela tse ngata. O ile a ba fa matla a ho tobana le liteko le liqholotso tsa ho paka meetlong e tletseng bora. O ile a ba tataisetsa ho batho ba patlong ka lipelo tse tiileng. O ne a lokisa lipelo tsa batho ba litoropong le pele balumeli ba fihla litoropong tseo. O ile a bula menyako ea menyetla eo ba neng ba sa nahane hore e ka ba teng 'me a matlafatsa mantsoe le liketso tsa bona.

Bala Liketso 7:55; Liketso 8:29; Liketso 11:15; Liketso 15:28, 29; le Liketso 16:6–10. Moea o Halalelang o ile a sebeletsa barutuo ba neng ba paka joang boiphihlelong ka bong ho a thathamisitsoeng litemaneng tsee? Ka mantsoe a mang, ke lintho li fe tse fapaneng tseo Moea o Halalelang o li entseng maemong aa?

Bosebeletsi bo fapaneng ba Moea o Halalelang mongoaha-kholong oa pele e ne e le bo hlollang. Liketsahalo tse kaholimo empa e le mehlala feela ea liketso tsa Hae. O ile a matlatsatsa Setefane hore a pakele Morena oa Hae har' a letlaburu la batho ba neng ba tsoile taolong ba mo tlepetsa ka majoe ho isa lefung. O ile a tataisetsa Filipi ho mo-Ethiopia ea neng a na le tšusumetso ea neng a batla 'nete hore a bulele Afrika evangeli. A fa Petrose letšoao le tiisang taba ha balumeli ba Balichaba le bona ba amohela Moea o Halalelang. O ile a kopanya kereke bonngoeng nakong eo e ka beng e arohane habonolo feela ka lebaka la taba ea lebollo, 'me a bula kontinente eohle ea Europe hore e rutoe evangeli ka moapostola Pauluse.

Moea o Halalelang o ne a le sebetsa ka matla kerekeng ea Testamente e Ncha 'me o ntse a sebetsa le bophelong ba kereke kajeno. O laba-labela ho re matlafatsa, ho re ruta, ho re tataisa, ho re kopanya, 'me a re rome ka thomo ea bohlokoahali ka ho fetisisa lefatšeng, e leng ho tlisa banna le basali ho Jesu le 'nete ea Hae. ntlha eo re lokelang ho e hopola ke hore o ntse a le sehlahlo a le tšebetsong le kajeno, joalo feela ka nakong ea baapostola le ea kereke ea pele.

Re ka etsa eng letsatsi ka letsatsi, ho etsa hore re be boemong boo re ka neoang matla a Moea o Halalelang maphelong a rona? Ke mefuta e fe ea khetho tse nepahetseng e tla mo lumella ho sebetsa ka ho rona le ka rona?

Moea o Halalelang, Lentsoe, le Bopaki

Lentsoe la Molimo le ne le le bohareng ba bopaki ba kereke ea Testamente e Ncha. Thero ea Petrose ka letsatsi la Pentakonta e ne thehiloe haholo holim'a Testamente ea Khale ho paka hore Kreste ke Mesia. Bopaki ba lefu la Setefane ba hlaloba nalane ea Israele ba Testamente ea Khale. Petrose o ne a bua ka “lentsoe leo Molimo o le rometseng ho bana ba Israele” (Liketso 10:36) eaba o arolelana ka pale ea Tsoho le Kornele. Khafetsa moapostola Pauluse o ne a bua ka boporofeta ba Testamente ea Khale bo buang ka ho tla ha Mesia, le Filipi o ne a hlalosa ka hlokolosi ho mo-Ethopia bohlokoa ba boporofeta bo buang ka Mesia ho Esaia 53. Ketsahalong ka 'ngoe, barutuo ba ne ba phatlalatsa Lentsoe la Molimo, e seng la bona. Lentsoe le susumelitsong ke Moea e ne e le ona mohloli oa matla a bona.

Bala Liketso 4:4, 31; Liketso 8:4; Liketso 13:48, 49; Liketso 17:2; Liketso 18:24, 25. Litemana tsee li re ruta eng ka kamano ea Moea o Halalelang le Lentsoe la Molimo, le bopaki kerekeng ea Testamente e Ncha?

Eena Moea o Halalelang ea susumelitseng Lentsoe la Molimo, o sebetsa ka lona Lentsoe ho fetola maphelo. Ho na le matla a fanang ka bophelo Lentsoeng la Molimo hobane, ka Moea, ke Lentsoe le phelang la Kreste.

Bala 2 Petrose Peter 1:21 le Baheberu 4:12. Hobaneng ha Lentsoe la Molimo le le matla ha kaale ho fetola maphelo?

“Matla a pōpo a buileng eaba mafatše a e-ba teng a lentsoeng la Molimo. Lentsoe lena le fana ka matla; le tsoala bophelo. Taelo e 'ngoe le e 'ngoe ke tšepiso; ha le amoheloa ke kelello, le fihlela moeng, le tla le nkile bophelo ba Rabosafeleng. Le fetola tlhaho ‘me le bope bocha moea ka setšoantšo sa Molimo.”—Ellen G. White, *Education*, leq. 126. Lebaka leo Bible e nang le matla a maholo ha kana ho fetola maphelo ke hobane Moea o Halalelang o susumelitseng Bible ho tloha sethathong e ntse e le oona o re susumetsang, o re fetolang ha re le bala. Ha re arolelana Lentsoe la Molimo le ba bang, Moea o Halalelang o sebetsa ho fetola maphelo a bona ka Lentsoe leo a le susumelitseng. Molimo o tšepisitse ho hlohonolofatsa Lentsoe la Hae, e seng mantsoe a rona. Matla a Lentsoeng la Molimo, e seng litabeng tsa motho.

Matla a Moea o Halalelang a Fetolang Bophelo

Boithuto bo hlokolosi ba buka ea Liketso bo senola Molimo ka tšebetso ea Moea oa Hae o etsang mehlolo maphelong a batho. Liketso ke boithuto ba liketsahalo tsa ha evangeli e hlola litšekamelo tsa meetlo, e fetola litloaelo tsa bophelo bohle, tse hahetseng, ‘me e ruta batho bohle mohau oa Molimo le ‘nete. Moea o Halalelang o kopana le batho moo ba leng teng, empa ha o ba sice ba ntse ba le hona moo. Botennng ba hae ba ea fetoha. Maphelo a bona a nchafala.

Bala Liketso 16:11–15, 23–34; Liketso 17:33, 34; Le Liketso 18:8. Tsena ke lipale tse fokolang feela tsa tšokoloho ka Bibeleng. Liketsahalo tse fapaneng li re rutang ka matla a Molimo a ho fetola maphelo a mefuta eohle ea batho ba tsoang libakeng tse fapaneng?

Phapano e makatsang ha ka kang ea batho. Lidia e ne e le mosali oa mo-Juda a mohoebi a atlehileng, molebeli oa chankana oa Filipi e ne e le mo-Roma oa oa maemo a mahareng a sebeletsang ‘musong. Moea o Halalelang o ka fihlela sechaba ka bophara. Matla a Hae a ho fetola a fihlela banna le basali, barui le bafumanehi, barutehi le ba sa rutchang. Mefuta e ‘meli e qetelang lenaneng la rona le eona ea lekana ka ho makatsa. Liketso 17:34 e bua ka tšokoloho ea Denise oa Areopago. Ba-Athene ba Areopago e ne e le karolo ea lekhotla la baahloli ba neng ba sebetsana le linyeoe lekhotleng. Ba ne ba hlhalletse ka mahetla, e le litho tse hlomphehang tsa sechaba sa Gerike.

Ka matla a Moea o Halalelang, bosebeletsi ba moapostola Pauluse bo fihletse le maemo a holimo ka ho fetisa sechabeng. Crispo (Liketso 18:8) e ne e le ‘musi oa sinagoge ea ba-Juda. E ne e le moetapele oa borapeli ea tebileng mehopolong ea Testamente ea Khale, ‘me Moea o Halalelang o ile oa phunyeletsa oa fetola bophelo ba hae. Nalane ena ea lietsahala e se senolela hore ha re ntse re paka ka Kreste ‘me re arolelana Lentsoe la Hae le ba bang, Moea o Halalelang o tla etsa limaka maphelong a mefuta eohle ea batho ho tsoa libakeng, meetlong, thutong, le litumelong tsohle. Ha rea lokela ho nahana hore ho na le motho ea ke keng a fihleleha. Mosebetsi oa rona ke ho pakela mang kapa mang le e mong le e mong a fihlang maphelong a rona. Morena o tla etsa tse salletseng.

Lefu la Kreste le ne le akaretsa; ke hore, le ne le le bakeng sa motho e mong le e mong. ‘Nete ee ea bohlokoa e lokela ho re ruta eng ka hore le ka mohla o le mong ha rea lokela ho nahana hore ho na le motho e mong eo ho seng ho se na tšepo ea hore a ka pholoha?

Ho Ithuta Haholoanyane:

Bala Ellen G. White, “The Gift of the Spirit,” maq. 47–56, ho *The Acts of the Apostles*; “‘Pelo tsa lona di se ferekane,’” maq. 667–672, ho *The Desire of Ages*. Moea o Halalelang o sebetsa ‘moho le Ntate le Mora mosebetsing oa topollo. Liketsong tsohle tsa rona tsa ho paka, re ikopanya le Eena mosebetsing oa Hae oa ho boloka batho. O kholisa lipelo. O bula menyako ea menyetla. Ka Lentsoe la Hae, o elisa likelello ‘me o senola ‘nete. O thua marako a lenyatso a re fetotseng makhoba, o hlola litšekameloo tsa meetlo tse re sitisang ho bona ‘nete, ‘me o re lokolla mahlaahlelang a litloaelo tse mpe tse re tšoasitseng.

Ha re pakela Jesu, ho bohlokoa ho hopola hore re sebetsa ‘moho le Moea o Halalelang. O teng kapele ho rona, a lokisa lipelo hore li amohele molaetsa oa evangeli. O na le rona, o foka likelellong ha re etsa ketso e sa reoang ea mosa, re arolelana bopaki ba rona, re tsamaisa boithuto ba Bible, ha re fana ka pampitšana e tletseng ‘nete, kapa re nka karolo lelekgeng la evangeli. O tla tsoela pele ho sebetsa pelong ea motho nako e telele la kamorao hore re tlohe, a etsa sohle se matleng a Hae ho tataisetsa motho eo pholohong.

Lipotso tsa Puisano:

1. Arolelana le litho tsa sehlopha sa hau sa Sabatha Sekolo ka nako eo o kileng oa bona Moea o Halalelang ha o sebetsa ka matla ka bopaki ba hau.
2. Na u kile oa utloa o na le tšabo le thothomelo ka ho arolelana ka tumelo ea hau? Tsebo ea bosebeletsi ba Moea o Halalelang e fokotsa letsoalo leo joang ‘me e o fe tiisetso ha u ntse u paka?
3. Thutong ea beke ena, re buile ka “mosebetsi” oa Moea o Halalelang bopaking ba rona. Buisanang ka litsela tse fapaneng tseo Moea o Halalelang o sebetsang le rona malekgeng a rona a ho paka. Moea o Halalelang o re fa matla joang bakeng sa ho paka le ho sebetsa maphelong a batho ba bang ha re ntse re paka?
4. Thuto e buile kamoo Bible e leng khubung ea ho paka. Hobaneng ha Bible e le karolo ea bohlokoa ea tumelo ea rona le bopaki? Re ka qoba mraba a bao, leha ba bolela hore ba lumela Bible, ba fokolisang matla a eona le bopaki ka masene joang?